



UNIVERSITÄTS-
BIBLIOTHEK
PADERBORN

Universitätsbibliothek Paderborn

Monvmenta Paderbornensia

Ferdinand <II., Paderborn, Bischof>

Paderbornae, 1669

11. Nobilivs Nvllvs Me Capvt Amnis Habet.

urn:nbn:de:hbz:466:1-11425

les commoti graviter, cives ceperunt persequi, & eos persequendo insatiabiliter grassari. Et nisi regia potestate retinerentur, omnes usque ad internecionem prosequerentur. Cum plurima igitur difficultate sedatorumultu, castigatisque illis quorum stultitia causa seditionis exstitit: inde rex Dinsberg properat, & illic Lothariensium adventum expectat.

II. NOBILIVS NVLLVS ME CAPVT AMNIS HABET. Præter Pontificis Max. Imperatorum & regum hospitium, externorum principum legationes, Francorum & Saxonum conventus, & castrorum metationes caput Paderbornobilitat singularis amœnitas, & aquarum copia vix usquam uberior admirabiliorque, in Panegyrico Paderbor. Joannis Horrionis ad vivum depicta lib. II. cap. VII. Quod si, ut est apud Strabonem, Gymnasio liberalium artium, quod erat Tharsi in Cilicia Cydnus amnis, cujus saluberrima aqua ferebatur, plurimum celebritatis attulit, nihilne habebit ad illustrandam Paderborne Academiam, hæc salubrium fontium copia, quibus ambigere possis, plusne palati, & valetudinis, an aspectus, & voluptatis gratia delecteris? Neque enim sentio quæ possit species esse jucundior, quàm trium fontium in media urbe, ex eodem colle, modico intervallo exorientium, tantamque subitò vim aquarum erumpentium, ut, non modicis effusi rivis, ante in unum abveum visendo sanè agmine confluant, complurèsque molas frumentarias prius versent, quàm se effundant è mœnibus. Quanta amœnitas singulorum cum seorsim fluunt? quanta omnium cum uno amne labuntur? quàm juvat aquam ipsam omni crystallo puriorem intueri, & innascentes viridissimas herbulas numerare? quale spectaculum anaticulas, & cygnos videre in medijs undis pendulos, suspensa cauda, nitentibus contra profluentem pedibus, pronò rostro piscantes? quæ voluptas ne seve quidem bruma in-

clementia

clementia unquam eripitur. Qua enim tempestate nive omnia fœda sunt, & gelu, non modo intra urbem, sed etiam non modico foris spatio, ne secundum quidem ripas, ut fert mos caterorum amnium, vel in tenuissimas crustas congeliat. Quid quod eodem tempore peregrinas aves ad se noster amnis allicit, quæ fluvij assuetæ, ubi glacie cateris prohibentur, ad hunc confugiunt? Æstate verò, potestne quicquam illis viridarijs, hortis, pomarijs, quibus utraque ejus ripa prætextitur, esse formosius? Non enim nunc vacat aquam commemorare tota prope urbe per canales singulari artificio dispensatam, non salientes fontes, non piscinas, non lavatrinæ, non sexcenta commoda. Quod si collibitum erit egredi urbe, quem non delectet cursum ejus prosequi, modo pleno incedentis amne, modo divisis quasi copijs insulas ambientis, modo vario flexu, & grato errore per virentia prata serpentis, modo limpidissimos rivos amplectentis sinu, modo celeberrimum Romanis annalibus flumen Luppiam, vel cum jactura sui nominis generantis? Sed concludamus has Paderæ notas insigni elogio Gobel. Personæ in Cosmodr. Ætat. 6. cap. 38. quod ipse ab antiquo scriptore Vitæ S. Liborij est mutuatus. Ad hunc locum Karolus sepe divertit, quoniam ut scribit quidam, qui postea in eodem loco, tempore Arnulphi regis, vitam duxit religiosam HIC LOCUS VIRIS OMNI NOBILITATE GENERIS ANIMIQUE SEMPER INSIGNIBVS ABVNDABAT, VT NON ESSET DVBIVM, QVIN PATRIA CIVIBVS ET CIVES PATRIAE CONGRVERENT, AC SIBI VTRINQVE ORNAMENTO FORENT.